

Lô bio tin du chomâje

- Loevisè : (krotzètè) Jule tè fau tè lèvé, lè l'oeura d'alé tipé. (on bokon apri) Fau te alé tè désoné avoui n'a silono d'ivoue fraide.
- Jule : Mè lèvô, mè laivô. Sai lèvo (traversè a galô)
- Loevizè : Si chomâje tyinta broeta tzouza, n'a via a vèni fou. Lô dzô droemon, è lô ni fan la senegouda din li pintè, tantyè kan li fôton foura. Apri l'aruvon a maison in trambetche è tzanté, è zou, è zou, è zou, la fluta in n'akajou. Pouai fedrai kô yi firè dè joli jouai a hloeu saunakroué. Sin dzoeyè pâmi, fedrai proeu trové on remiedô.
- Jule : T'avé pâ manka dè te baye via, sin arouevo lô prèmiè pô tipé.
- Loevizè : Vouè, vouè, avoui la gordze ti lô prèmiè partô. Se te sé se for avoui li bri tyè avoui la dyoeula, toe saré pâ u chomâje.
- Jule : Oeu, oue ! Tè fau pâ ézajeré. Noe sin tye ju u chomâje. L'an thou la bouaite.
- Loevizè : Damâdzô tye ti pâ ju dedin kan l'an soute. Vora toe fi pâ ni trai ni katrô, toe sortè du chomâje, pouai toe vâ travaye in tche l'onthè Fardinan, tzertzè d'ovrai.
- Jule : Yau voeu-te tye yalesô travaye, mau fôtu min sai.
- Loevizè : Tyè ? Maladô, toe m'in n'â jamin prèdja. E se ti maladô, toe vâ u mèdèsin vora, t'â konprai.
- Jule : Toe sâ proeu tye yanmô pâ alé u mèdèsin. Tè fedrai alé a tè, lô vè por mè Toe, toe sâ mioeu y'espleké min lè ton n'ômô.
- Loevizè : Se me fau tô y'espleké min lè mon n'ômô, yin né pô n'a senâna. U mèdèsin fau pâ tyè y'espleké. Fau a min yi porté on n'amôlon d'urena pô l'analize. Va peche din si amôlon, pouai lô badô u mèdèsin. (Jule sortè). U mèdèsin, yi derè tyè ? Enfin vora mè fau pâ mè léminté avoui sin. Yin né dza proeu dè trakasèri avoui si pôtré.
- Jule : (Intrè) Yé lacha tzè l'amôlon, lè ju krapo, adon yé pecha din si bôtèdon, lè kô mioeu pô l'analize, se yin nè on mouè dèplô.
- Loevizè : Oeu! Kayon dè kayon! A toe fi tô sin d'on gnâdzô.

Jule : Vouè, vouè, mè kô pâ fran tô alo.

Loevizè : E bin mon vioeu ! T'â na pètoetha komparâbla u balon dè Pikâ. Mè hla bonbona din si panai pouai lè bin. (dè sortè)

Jule : Sin fi joestô on mai tye sai u chomâje. Mè simblè tye yè dza on n'an. Lè pâ aija dè vivrè lô chomâje. Kan on sondzè bien, lè na via dè bôyè. Lô dzô on droemè, lô ni on sokatè dè na pinta a l'âtra. Fau pâ s'étoné se kan on n'aruvè a maizon a mie ni, la fena de droemè min on tron. Sai chuire de fi simblan dè droemi. Mi din lô fon lè rin drôlô, la komprinzô. Mè fedrai proeu tchandje dè via pô pâ avai la senegouda a maizon. Mè fau sorti dè si chomâje, pouai alé travaye. Mè fau éprôvé dè tèlèfoné a l'onthè Fardinan. (Tèlèfonè). Lè Jule tye tèlèfonè, bondzô l'onthè Fardinan... Vouè, vouè, in bona santé... Lè lô chomâje tye mè konvin pâ. Yanmèrè bien trové dè travayô ? Kouemin voue detè ? ... Vouè... Vouè, vouè, vé lai... Bin chuire tye sai d'akô.... Marsi bien l'onthè Fardinan, voue poeudè konté su mè. Dèman matin a sai z'oeurè è demie sai avoui vô. Enkô bien gran marsi (posè lô tèlèfonè). Vôra min vé firè pô derè a la fena tye dèman vé yé fi krirè tye yérô bien maladô. Lè te pâ monstrô sin... Kan on ninrèyè a derè dè mintèri, apri on sâ pâ min firè pô torné derè la vèreto. Mè vâ rin dè mè krozé la tita avoui sin. Y'apreyandô dè vè arouevé la fena ... (s'abôtzè su la tâbla) .

Loevizè : (Intrè) Toe droemè u tyè ?

Jule : Pâ, pâ, droemô pâ, moezenô. Tye t'a de lô mèdèsin ?

Loevizè : Lô mèdèsin m'a de tye t'érè kouezeno. Se toe tchandjevè pâ dè rèjemô, t'in n'avé pâmi pô vouerba. M'a de tye d'apri sô tye yérè din l'urena, t'avé dza din la pètoetha la pira, min din li bôse du vin.

Jule : Kouezeno ?... Lè pâ pouesiblô... Stoeu dzô paso, lè vèré tye yérô mau fôtu, mi vôra ai tyitô. Dayoeu, sai pâ ni gordô, ni rin, râda pie.(fi dè menè).

Loevizè : (Sè kraivè dè rirè) T'â kanmimô pouaire dè pasé oeutrè ? ... Fi tè pâ dè bila. Lô mèdèsin m'a de tye di la pôma d'Adam u bè di z'artè, t'érè in pléna forma.

Jule : E di la pôma d'Adam innâ, tye yè ?

Loevizè : Di la pôma d'Adam innâ, l'a de tye yérè pâ gran badyè. Mi yérè pâ manka dè sè firè pouaire. L'érè pâ na maladie. Sin l'érè on vouldô dè naisanse. L'a de l'érè innoyoeu, mi sin l'impatzè pâ dè vèni vioeu.

Jule : Mè fau kô t'in derè vouena. Sortô du chomâje, vé travaye tche l'onthè Fardinan, yinrèyô dèman matin.

Loevizè : Sai kontinta toe fi bien dè torné travaye pô tè rèpozé du chomâje. E yô vé parti in vâkanse dèman matin, por on mai, min t'â ju toe avoui lô chomâje. Toe tè fari pâ dè sousi, tè mandèrai na kârta pô tè derè yau sai, è min sin va, u bor dè la mè.